

NORÛ TAXRE GA POPERA GA TIMUTÉUCA_X NAXÜMATÜXÛ GA PAURU

Timutéuxü narümo_xẽ ga Pauru

¹ Pa Timutéux, choma i Pauru nixĩ i cuxcèx chanaxümatüxü i ñaã popera. Rü choxü nixĩ ga namuxü ga Ngechuchu ya Cristu, yerü yemaãcü nanaxwèxe ga Tupana. Rü nüma choxü namu na nüxü chixuxüçèx na ñuxãcü tüxü nangèxmaxü i maxü i taguma gúxü, ega aixcüma Ngechuchu ya Cristuaxü yaxögügu. ² Cuxü changechaü, Pa Chaune, Pa Timutéux. Rü chanaxwèxe ya Tanatü ya Tupana rü Ngechuchu ya Cristu ya tórü Cori na cuxü nangüxèègüxü rü nüxü cungechaütümüügüxü rü cuxü nataãèxèègüxü.

Tama name i taxãne na Cristuchigaxü ixuxü

³ Guxüguma i chütacü rü ngunecü rü cuxna chacuèxãchixü i chorü yumüxèwa, rü poraãcü cuxcèx moxè Tupanana chaxã. Rü nüxü nixĩ i chapuracüxü i mexü i chauãemaã, yexgumarüü ga nuxcümaügüxü ga chorü oxigü naxügüürüü. ⁴ Choma rü nüxna chacuèxãchi na ñuxãcü poraãcü chauxcèx cungechaüxü rü chauxcèx cuxaxuxü ga yexguma cuxna íchixüxgu. Rü wenaxãrü cuxü chadauxchaü na aixcüma chataãèxüçèx, ⁵ Erü nüxna chacuèxãchi na ñuxãcü aixcüma Tupanaãxü cuyaxõxü. Rü curü noxè ga Loída rü cue ga Euníchia rü tüma rü woetama tüxira Tupanaãxü tayaxögü rü

nüxũ chacuèx i ñuxma rü cuma rü ta aixcüma cuyaxõxũ.
⁶ Rü ngẽmacèx cumaã nüxũ chixu na cugü cuporaxẽxũ
na yexeraãcü cunaxüamaxücèx i ngẽma Tupanaãrü
puracü ga naxcèx cuxna naxãxũ ga cuèx ga yexguma
noxri cuxũ chingõgüãcüma cumaã chayumüxëgu.
⁷ Yerü Tupana rü tama tüxna nanamu ga naãe i tüxũ
muũẽxũ. Natürü tüxna nanamu ga Naãe i Üünexũ
na tüxũ naporaexẽxücèx na aixcüma duũxügüxũ
ingechaũgüxücèx rü meã yigümaã icuáxücèx. ⁸ Rü tama
chanaxwèxe na cuxãnexũ na nüxũ quixuxũ i nachiga
ya tórü Cori. Rü ngëxgumarüũ ta tama chanaxwèxe
i chauxcèx cuxãne i ngẽma na chapoxcuxũ naxcèx i
Tupanaãrü ore. Rü name nixĩ i yaxna namaã cuxĩnü
i ngẽma ngúxũ i cuxcèx ínguxũ nagagu i ngẽma ore i
mexũ i nüxũ quixuxũ. Rü Tupana tá cuxũ naporaxëe.
⁹⁻¹⁰ Rü Tupana tüxũ namaxëxëe rü tüxũ nade na
naxcèxicatama imaxëxücèx. Natürü tama tacü rü mexũ
na ixüxügagu nixĩ ga yemaãcü tamaã namecümaxũ
ga Tupana. Natürü yemaãcü tüxũ narüngüxëe yerü
woetama yema nixĩ ga nanaxwèxexũ yerü Ngechuchu
ya Cristugagu tüxũ nangechaũ. Rü nüma ya Tupana ga
tautama naãne üxgumama tüxũ ngechaũcü, rü yexguma
ínguxgu ga tórü maxëxëeruũ ga Ngechuchu ya Cristu,
rü yexguma nixĩ ga Tupana tüxũ nüxũ dauxëxũ na
ñuxãcü poraãcü tüxũ nangechaũxũ. Rü nüma ga Cristu
nixĩ ga iyanaxoxëãxũ na iyuxuchixũ yerü nüma rü
yuwa ínarüda rü wena namaxũ. Rü norü orewa tüxũ
nüxũ nacuèxëe na yixema rü ta tüxũ nangëxmaxũ i
ngẽma maxũ i taguma gúxũ ega nüxũ yaxõxgu. ¹¹ Rü
Tupana choxũ ningucuchixëe na nüxũ chixuxücèx i

ngẽma norü ore i mexũ. Rü choxũ namu na ngẽma oremaã chanangúexẽxũcèx i duũxũgü i guxũwama. ¹²Rü ngẽmacèx nixĩ i poraãcü ngúxũ chingexũ rü chapoxcuxũ i ñuxmax. Natürü tama naxcèx chaxãne i ngẽma, erü choma nüxũ chacuèx na texéaxũ chayaxõxũ. Rü nüxũ chacuèx na naporaxũ i nüma na nüxna nadauxũcèx i ngẽma puracü i choxna naxãxũ rü namaã inacuáxũcèx i chauãẽ i guxũgutáma ñuxmatáta ngẽma ngunexũ i nagu wena núma naxũxũ. ¹³Rü chanaxwèxe i meãma nagu quixũ i ngẽma nguxẽẽtae i mexũ ga chauxũtawa naxcèx cungúxũ. Rü name nixĩ i meã nüxũ cuyaxõõma ya Ngechuchu ya Cristu rü meã nüxũ cungechaũ i guxũma i duũxũgü, erü Cristuarü duũxũ quixĩ. ¹⁴Rü name nixĩ i Tupanaãẽ i Üünexũ i tawa maxũxũãrũ ngũxẽẽmaã ícunapoxũ i ngẽma nguxẽẽtae i mexũ i Tupana cuxna ãxũ. ¹⁵Cuma marü nüxũ cucuèx rü guxũma ga yema yaxõgüxũ ga Áchiaarü naãnewa ne íxũ rü marü choxna naxĩgü. Rü yematanüwa nayexma ga Figueru rü Ermóquene. ¹⁶Onesíferu rü muẽxpüxcüna choxũ nataãẽxẽẽ, rü tama chauxcèx naxãne i ngẽma na chapoxcuxũ. Rü ngẽmacèx chanaxwèxe i tórü Coriaxũ nangechaũtümüũgü i guxũma i natanüxũgü. ¹⁷Rü yexguma noxritama Dumawa nanguxgu ga nümax, rü chauxcèx nadauecha rü ñuxmata choxũ iyangau. ¹⁸Cuma meãma nüxũ cucuèx ga ñuxãcü tüxũ na nangũxẽẽxũ ga Onesíferu ga Epéchiuarü ñãnewa. Rü ngẽmacèx chorü yumüxẽwa naxcèx íchaca na Tupanaãxũ nangechaũtümüũxũcèx i ngẽxguma wena ñoma i naãnewa naxũxgu ya tórü Cori ya Ngechuchu.

2

Ngechuchu ya Cristuarü puracütanüxü i mexüchiga

¹ Rü ñuxma, Pa Chaune, Pa Timutéux, ¡rü cugü naporaxêê namaã i ngêma pora i Ngechuchu ya Cristu cuxna äxü! ² Yema ore ga chauxütawa nüxü cuxínüxü ga yexguma muxüma ga duüxügüpéxewa nüxü chixuxgu, rü chanaxwèxe i ñuxma cuxi ngêma oremaã cunangúexêê i togü i yatügü i meã naãëxü cuèxgüxü na nüxí togüxü nangúexêêxücèx namaã i ngêma ore. ³ Rü tama name i naxcèx cumuü na Ngechuchu ya Cristuarü oregagu ngúxü quingexü. Natürü name i namaã cupora ñoma wüxi i mexü i norü churararüü. ⁴ Rü wüxi i duüxü i churarawa ngëxmaxü, rü taxucürüwama to i puracü i tama churaraarü ixixügu narüxínü. Natürü ngêma norü äëxgacü nagu namuxü i puracügu nixí i naxínüxü na ngêmaäcü norü äëxgacüxü nataãëxêêxücèx. ⁵ Rü ngëxgumarüü ta wüxi i duüxü i wüxi i ñnücawa nügü ingucuchixêêxü, rü taxuacüma nanayaxu i norü ãmare ega chixri naxínücèxwèxegu rü tama ngêma ñnücaarü äëxgacüga naxínügu. ⁶ Rü texé ya naãnewa puracüxe rü name nixí i tüxira tanayaxu i tümanetüarü o. ⁷ ¡Rü guxüguma nagu rüxínü i ñã ore i cumaã nüxü chixuxü! Rü nüma ya Cori ya Ngechuchu tá cumaã inananguxüxêê i guxüma na nüma nanaxwèxexüãcüma cunaxüxücèx i ngêma puracü. ⁸ ¡Rü nüxna nacüèxächí ya Ngechuchu ya Cristu ya Dabítanüxü ga guma yuwa írüdacü! Rü yimachiga nixí i ngêma ore i mexü i duüxügümaã nüxü chixuxü. ⁹ Rü ngêma oregagu nixí i ngúxü na chingexü rü ñoma wüxi i máëtaxürüü núma poxcupataüwa cadenameã chichotaxü. Natürü Tupanaarü ore i mexü, rü guxüwama nanguama rü taxucürüwama texé tayachota.

¹⁰ Rû ngêmacèx yaxna namaã chaxĩnũ i ngêma ngúxũ i chingexũ naxcèx i ngêma duũxũgũ i Tupana dexũ. Erũ chanaxwèxe i nûmagũ rû ta Ngechuchu ya Cristuaxũ nayaxõgũ, rû ngêmaãcũ na nayauxgũãxũcèx i maxũ i mexũ i taguma gúxũ. ¹¹ Rû pemaã nûxũ chixuxchaũ i wúxi i ore i aixcúma ixĩxũ. Rû ngêxguma Cristu yuxũrũũ norũ orecèx iyuegu, rû naxrũũ tá ta wena tamaxê na nûma íngêxmaxũwa íngêxmagũxũcèx. ¹² Rû ngêxguma ñoma i naãnewa yaxna namaã ixĩnũegu ega ngúxũ íngexgu, rû daxũguxũ i naãnewa rû wúxigu namaã ãêxgacũ tá tixĩgũ. Rû ngêxguma tama Cristuxũ icuáxchaũgu i ñoma i naãnewa, rû nûma rû tãútama tũxũ nacuáxchaũ i daxũguxũ i naãnewa. ¹³ Natürũ woo ñuxguacũ i yixema rû tama aixcúma naxũxgu i ngêma Tupanamaã ixunetaxũ, natürũ nûma ya Tupana rû guxũguma nayanguxêê i ngêma tamaã ínaxunetaxũ, erũ taxuacúma nũgútama nawomũxêê.

Wúxi i mexũ i puracũtanũxũ i Tupana namaã taãêxũchiga

¹⁴ Rû ngêma yaxõgũxũ i cuxũtawã ngêxmagũxũ, rû name nixĩ i Tupanaegagu nũxna nũxũ cucuèxãchixêê na tama nuxcúmaũgũxũ i ore i taxuwama mexũcèx nũgũmaã na yaporagatanũcũxũcèx. Erũ ngêma rû wúxi i chixexũ nixĩ, rû nanachixeãêxêê i ngêma duũxũgũ i nũxũ ñnũêxũ. ¹⁵ ¡Rû cugũ naporaxêê na meã cunaxũxũ i Tupanaãrũ puracũ na cumaã nataãêxũcèx i ngêxguma napêxewa cunguxgux rû ngemaãcũ taxucèxma cuxãnexũcèx i ngêxguma nûma cuxna nacaxgu naxcèx i curũ puracũchiga! ¡Rû ngêmacèx name i aixcúma meã namaã cungúexêêtae i ngêma ore i mexũ i aixcúma ixĩxũ! ¹⁶ ¡Rû nũxũ rüxo i ñoma i naãnecũãxãrũ dex-

agümare i taxuwama mexũ! Erü ngẽma duũxũgü i ngẽma dexagümaregu ìxũ, rü guxũguma yexeraãcü chixexũgu nayi. ¹⁷ Rü ngẽma norü nguxẽetae i ngẽma duũxũgü, rü ñoma wüxi i daaweane i tüxũ íyimachixẽxũrũũ nixĩ. Rü yema nixĩ ga nüxũ ngupetũxũ ga Imenéu rü Firetu. ¹⁸ Yerü nidoragümare ga nüxũ na yaxugüexũ rü marü na nangu-petũxũ i yuetaarü dachiga. Rü yemaãcü nanawomüxẽegü ga ñuxre ga duũxũgü na tama noxrirũũ yaxögüãxũcèx i Tupanaãrũ ore. ¹⁹ Natürü Tupanaãrũ ore rü taguma inayarüxo rü taguma naxüchicüü. Rü ngẽma norü orewa rü ñanagürü:

“Tórü Cori ya Tupana nüxũ nacuèx i texé tixĩ ya norü duũxũgü ixĩgüxe. Rü guxãma ya yíxema nüxũ ixuxe na Ngechuchu ya Cristu rü tumaãrũ Cori yĩxũ, rü name nixĩ i nüxna tixĩgachi i guxũma i chixexũ”,

ñanagürü i ngẽma norü orewa. ²⁰ Wüxi i duũxũ i dīeruãxũchixũ rü napatawa nangẽxma i poratu i uirunax-cèx rü dīerumünaxcèx. Rü nangẽxma ta i poratu i naĩ-naxcèx rü waixũmünaxcèx. Rü ngẽma poratu i uirunax-cèx rü dīerumünaxcèx rü mexũ i norü õnacèx nixĩ. Natürü ngẽma poratu i naĩnaxcèx rü waixũmünaxcèx rü guxchirechixũ nixĩ. ²¹ Rü ngẽxguma wüxi i yaxõxũ naxwèxegu na aixcüma mexũ i Tupanaãrũ puracütanũxũ na yĩxũ, rü name nixĩ i nüxna nixũgachi i guxũma i chixexũ. Rü ngẽxguma tá nixĩ i Tupanapéxewa aixcüma naxüünexũ na naxüãxũcèx i nagúxũraũxũ i puracü i Tupana namaã nüxũ ixuxũ. ²² ¡Nüxũ rüxo i guxũma i ngẽma chixexũ i ngextüxücügü nagu rüxĩnüèxũ! ¡Rü meã Tupanapéxewa namaxũ rü aixcüma nüxũ yaxõ! ¡Rü nüxũ nangechaũ i guxũma i duũxũgü, rü tãxú i namaã cunuxũ!

¡Rü ngẽmaãcü namaxũ wüxigu namaã i guxũma i ngẽma duũxũgü i aixcüma Tupanacèx maxẽxũ rü ngemaãcü yumüxẽgüxũ!. ²³ Rü tama name i naxcèx icurüxĩnü i ngẽma dexagü i taxuwama mexũ. Erü ngẽma dexagü-gagu rü düxwa nügüchi naxaie i duũxũgü. ²⁴ Rü wüxi i Tupanaãrü puracütanüxũ rü tama name na texemaã núcèx nadauxũ. Rü narümemae nixĩ na guxãma namecü-maxũ.. Rü nanaxwèxe i yaxna namaã naxĩnüãcüma meã duũxũgüxũ nangüxẽẽ i Tupanaãrü ore. ²⁵⁻²⁶ Rü wüxi i Tupanaãrü puracütanüxũ rü name na yaxna namaã naxĩnüãcüma meã nayaxucüxẽgüãxũ i ngẽma duũxũgü i tama irüxĩnüẽchaũxũ. Rü name i ngẽmaãcü Ínananguxẽẽ na Tupana nüxũ rüngüxẽẽxũ i ngẽma duũxũgü na nüxũ naxoexücèx i norü chixexũ rü nüxũ nacüxgüxũcèx i ngẽma ore i aixcüma ixĩxũ. Erü Tupana nanaxwèxe na naxuãgüxũ i ngẽma duũxũgü rü nawa Ínanguxũxũ i ngẽma chixexũ i ngoxo i Chataná nagu nayixẽẽxũ na noxrütama ngüchaũ namaã naxüxücèx.

3

Nuxãcü tá nixĩ i duũxũgücüma i ngẽxguma nagúxchaũgu i naãne

¹ Rü chanaxwèxe i nüxũ cucuèx rü ngẽxguma nagúxchaũgu i naãne rü tá nangẽxma i ãücümaxũgü rü guxchaxũgü naxcèx i duũxũgü. ² Rü duũxũgü rü tá nügüguxicatama narüxĩnüẽ, rü norü dīeruguama tá narüxĩnüẽ. Rü tá nügü nicuèxüxũgü, rü ngẽmaãcü tãütáma nüxũ nacüxgüchaũ i togü i duũxũgü i tama naxrüũ taarü dīeruãxgüxũ. Rü chixri Tupanachiga tá nidexagü, rü tãütáma nanatüga rü naẽga naxĩnüẽchaũ. Rü tãütáma moxẽ inaxã i ngẽxguma Tupana nüxũ rüngüxẽẽgu, rü

ngẽmaãcü tãütáma nüxũ nacuèxgüchaũ i Tupanaãrũ ore.
³ Rũ tãütáma nagu narũxĩnüẽ i togũ i duũxũgũxũ na nangechaũgũxũ, rũ tãütáma nüxũ nangechaũtũmũgũ. Rũ tá naxoregütèèxgũ, rũ tãütáma nügũ naporaexẽẽ na yaxna namaã naxĩnüèxũcèx i naxũneãrũ ngúchaũgũ. Rũ tá nichixecũma, rũ tá naxchi naxaie i guxũma i ngema mexũ. ⁴ Rũ duũxũgũechitawèxegũxũ tá nixĩgũ, rũ nuẽwèxexũ tá nixĩgũ, rũ nügũ icuèxũũgũxũ tá nixĩgũ. Rũ tá norũ ngúchaũcèxama nadaugũ, rũ tãütáma Tupanaxũ nacuèxgüchaũ. ⁵ Rũ tá nügũ nayaxõgũxüchinetaxẽẽ natürũ ngẽma norũ chixexũ i naxügũxũwa tá nangoxoma na tama aixcũma yaxõgũãxũ i ngẽma ore i mexũ. Rũ ngẽma duũxũgũ i ngẽmaãcü maxèxũ, rũ tama name na namaã cuxãmücũxũ rũ natanũgu cuxãxũ. ⁶⁻⁷ Erũ ngẽma duũxũgũtanũwa nangẽxmagũ i nümaxũ i ĩpatagu ichocuetanũxũ. Rũ norũ nguxẽètaemaã nayawomũxèègũ i ngẽma ngexũgũ i ngema ngẽxmagũxũ i tama naãèxũ icuáxũ rũ chixri maxèxũ. Rũ ngẽma ngexũgũ, rũ norũ ngúchaũgũtama chixexũwa nanagagũ, rũ ngẽmacèx woo guxũguma nangúe natürũ taguma aixcũma nüxũ nacuèxgũ i ngẽma ore i aixcũma ixĩxũ. ⁸ Rũ ngẽma duũxũgũ i chixexũmaã nguxèètaegũxũ, rũ chixexũguxicatama narũxĩnüẽ, rũ tama aixcũma nayaxõgũ i Tupanaãrũ ore. Rũ naxchi naxaie i ngẽma ore i aixcũma ixĩxũ, naxrũũ ga yema yuũxũgũ ga Yane rũ Yáũbre ga tama Moĩchéga ĩnüèchaũxũ. ⁹ Natürũ tãütáma muxũ i duũxũgũ nüxũ nayaxõgũ. Erũ guxũwama i duũxũgũ rũ tá nüxũ nicuèxãchitanũ na wüxi i duũxũgũ i chixexũgu rüxĩnüèxũ rũ ngeãẽmarexũ yixĩgũxũ naxrũxũ ga yema taxre ga tama Moĩchéga ĩnüèchaũxũ.

*Ucux*ẽmaã inyacuèxẽẽ ga Pauru na Timutéumaã yadexaxũ

¹⁰⁻¹¹ Natürü cumax, Pa Timutéux, marü nüxũ cucuèx ga ñuxãcü meã na chanangúexẽẽxũ ga duũxũgü, rü ñuxãcü meã chamaxũxũ, rü ñuxãcü nagu charüxĩnũxũ rü meã chayaxõxũ, rü ñuxãcü yaxna namaã chaxĩnũxũ ga duũxũgü rü nüxũ changechaũxũ. Rü cuma nüxũ cucuèx ga ñuxãcü na chaugü chaporaxẽẽxũ na yaxna namaã chaxĩnũxũ i guxchaxũgü. Yerü ga duũxũgü rü chowe ningexũtanü na choxũ yamèxgüxũcèx. Rü cuma rü nüxũ cucuèx ga ñacü choxũ na üpetũxũ ga Aũtioquíawa rü Icúniüwa rü Listrawa, rü ñuxãcü chowe na yangexũtanũxũ rü poraãcü ngúxũ chingexũ. Natürü tórü Cori ya Tupana choxũ ínapoxũ na tama choxũ yamèxgüxũcèx. ¹² Rü aixcüma cumaã nüxũ chixu rü guxãma ya yíxema naxwèxegüe na Ngechuchu ya Cristucèx tamaxẽxũ, rü togü tá tùmachi naxaie rü chixri tá tùmamaã nachopetü. ¹³ Natürü ngẽma duũxũgü i chixecümagũxũ rü ngẽma duũxũgü i idoratèèxgüxũ rü yexeraxũ i chixexũgu tá nayi. Erü Chataná marü nayawomüxẽẽgü, rü ngẽmacèx nüxĩ togüxũ nawomüxẽẽgü. ¹⁴ Natürü i cuma rü name nixĩ i guxũguma meã nagu quixũ i guxũma i ngẽma ore i marü cungúxũ. Erü cumatama rü nüxũ cucuèx na aixcüma yĩxũ i ngẽma ore, rü nüxũ cucuèx na texégü tixĩgüxũ ga guxema namaã cuzũ nguxẽègüxe. ¹⁵ Rü cuma nüxũ cucuèx rü cubuxgumamatama nawa cungux i ngẽma Tupanaãrü ore i üünexũ. Rü ngẽmawa cunayaxu i cuèx na nüxũ cucuáxũcèx i ñuxãcü tüxũ na nangèxmaxũ i maxũ i taguma gúxũ ega Ngechuchu ya Cristuaxũ yaxõgügu. ¹⁶ Rü guxũma i Tupanaãrü ore i ümatũxũ rü

nügüãewatama nanayaxu ga Tupana. Rü ngẽma ore rü name na duũxũgũxũ namaã ingúexẽxũ, rü namaã yaxucuxẽgũxũ rü namaã iyanawéxãchixẽgũxũ, rü namaã nangúexẽxũ na meã Tupanapéxewa namaxẽxũcèx. ¹⁷ Rü ngẽmaãcü i ngẽma ore rü tüxũ narüngũxẽẽ ya yíxema Tupanaãrũ ixĩxẽ, na meã nüxũ tacuáxũcèx i ngẽma Tupana naxwèxexũ rü ítamemarexũ na tanaxũxũ i nagúxũraũxũ i puracü i Tupana tümamaã nüxũ ixuxũ.

4

¹⁻² Rü nüma ya Ngechuchu ya Cristu ya núma tá ücü na nüxũ yacagũxũcèx i ngẽma duũxũgũ i maxẽxũ rü ngẽma marü yuechiréxũ, rü yimapéxewa rü Tupanapéxewa cuxũ chamu na nüxũ quixuxũcèx i ngẽma ore i mexũ. Rü ngẽxguma cuxũ yatauxchaãchigu rü woo cuxũ naguxchagu, rü chanaxwèxe i nüxũ quixuama i ngẽma ore. Rü ngẽmaãcü chanaxwèxe na icuyanawéxãchixẽgũxũ rü meã cuyaxucuxẽgũxũ rü nüxũ cunangúchaũxẽxũ i duũxũgũ. Rü name nixĩ i yaxna namaã cuxĩnüãcüma meã cunangúexẽẽ. ³ Erü yixcüra i duũxũgũ rü tãütáma nüxũ naxĩnüẽchaũ i ngẽma nguxẽẽtae i mexũ. Erü ngẽma duũxũgũ rü nichixecüma. Rü ngẽmacèx naxcèx nadaugü i norü ngúexẽẽruũgũ i nüma nanaxwèxegũxũãcüma nangúexẽẽxũ. ⁴ Rü tãütáma nüxũ naxĩnüẽchaũ i Tupanaãrũ ore i aixcüma ixĩxũ. Erü ngẽma ore i doramare ixĩxũguama tá narüxĩnüẽ. ⁵ ¡Natürü cuma rü meã cugüna nadau, rü ínaxuãẽ, rü namaã natora ega ngúxũ cuxũ üpetügu! ¡Rü nüxũ ixuama i ore i mexũ i tüxũ maxẽxẽxũ, rü meã yanguxẽẽ i ngẽma puracü i Tupana cuxna ãxũ! ⁶ Tãütáma muxũ i ngunexũ ñoma i naãnewa changẽxma

erü marü choxũ ningaica na Tupanaãrũ puracü chaxüxũ-gagu chayuxũ rü choxũ na yamèngxüxũ i duüxũgü. ⁷ Rü choma rü marü chayanguxêe i ngema puracü i Tupana choxna äxũ. Rü ñuxma na nagúxũ i ngema puracü rü taguma nüxũ charüxo na chayaxõxũ. ⁸ Rü ñuxma rü marü Tupana choxũ namaã nanguxũ i ngẽma ãmare i mexêchixũ ya tórü Cori ya Ngechuchu ya ãëxgacü ya mecü tá choxna äxũ i ngëxguma wenaxãrũ ñoma i naãnewa naxüxgu. Rü tãütãma chaxica choxna nanaxã i ngẽma ãmare, natürü tá tüxna nanaxã ya guxãma ya yíxema tũmaãrũ ngúchaũmaã ínanguxëëgüxe na wenaxãrũ núma naxüxũ.

Timutéuxũ naxucuxê ga Pauru

⁹ Cumaã nüxũ chixu rü chanaxwèxe i paxa nuã cuxũ, rü choxũ ícuyadau. ¹⁰ Dema rü ñoma i naãneãrũ ngẽmaxũgu naxínüxũgagu choxna nixü rü ñãne ga Techarónicawa naxü. Rü Crechéüte rü Gárataanewa naxü, rü Titu i Darumáchiaanewa. ¹¹ Rü Lucaxicatama nixĩ i ñuxma chauxütawa ngëxmaxũ. Rü chanaxwèxe i naxcèx cudadu i Marcu na nuã cunagaxüçèx. Erü nüma rü chauxcèx name na choxũ na nangüxëëxũ i ñãã puracüwa. ¹² Rü Tíquicu rü ñãne ya Epéchiuwa chanamu. ¹³ ¡Ngëxguma nuã cuxüxgu rü nuã nange i chorü gáuxüchiru ga ñãne i Tróawa ngëxmaxũ ga Carpupatawa chatáxũ! Rü chanaxwèxe i nuã cunana i chorü poperagü. Rü guxũãrũ yexera chanaxwèxe na nua cunanaxũ i chorü poperagü i idixgüpútaxũ. ¹⁴ Areyáüdrü i cobrenaxcèx i buetarearü üwa puracüxũ rü poraãcü chixri chomaã naxüpetü. Natürü Tupana nüxũ nacüèx i ñuxãcü tá na napoxcuãxũ naxcèx ga yema chixexũ ga chomaã naxüxũ. ¹⁵ ¡Meã cugüna nadau na tama chixexũ cumaã naxüxüçèx!

Erü poraãcüxüchima naxchi naxai i Tupanaãrü ore i mexü. ¹⁶ Yexguma noxrixüchima ãëxgacügüpéxewa chaugüétüwa chideaxgu rü taxúema choxü tarüngüxëë. Guxüma choxna nibuxmü. Natürü tama chanaxwèxe ya Tupana rü nagu narüxînü i ngëma. ¹⁷ Natürü tórü Cori choxü naporaxëë rü choxü narüngüxëë na choxü natauxchaxüçèx na nüxü chixuxüçèx ga norü ore i mexü i tüxü maxëëëxü. Rü yemaãcü guxüma ga yema duüxügü ga tama yaxögüxü ga yéma yexmagüxü rü nüxü naxînüë ga yema ore. Rü yemaãcü tórü Cori ya Ngechuchu choxü íngaxuchixëë ga yexguma taxü ga ãücümaxüwa chayexmagu. ¹⁸ Rü nüma ya tórü Cori tá choxü íngaxuchixëë nawa i guxüma i chixexügü. Rü tá choxna nadau na ngextá ãëxgacü íyíxüwa choxü nagaxüçèx. Rü name i guxüguma nüxü ticuèüügü. Rü ngëmaãcü yî.

Pauru rü wenaxãrü Timutéuxü narümoxë rü naxçèx ínaca na Cori ya Ngechuchu ya Cristu nüxü rüngüxëëxü

¹⁹ Chanaxwèxe i chauégagu nüxü curümoxë i Prisila, rü Aquiru, rü Onechéperutanüxügü. ²⁰ Eratu rü ããne i Corítiugu narüxãüx. Rü Turuquínu rü ídaawexüma ããne i Miretuwa chanaçèx. ²¹ Rü naxüpa i gáuanexü rü chanaxwèxe i nuã cuxü. Rü cuxü narümoxëgü i Eubúru, rü Prudëte, rü Linu, rü Cúdia, rü guxüma i taeneëgü i yaxögüxü. ²² Rü chanaxwèxe i tórü Cori ya Ngechuchu ya Cristu cumaã nangëxma, rü Tupana pexü narüngüxëë ya guxãma i pemax.

Rü nuãma pexna,
Pauru

Tupanaarü Ore i Tóriu Cori ya Ngechuchu ya Cristuchiga
New Testament in Ticuna (PE:tca:Ticuna)

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective

copyright owners.

2014-04-30

PDF generated using Haiola and XeLaTeX on 14 Jun 2022 from source files dated 28 May 2022

9d5dc22a-30be-5d26-85a9-76047f4c89e6